

Piste 312_4

Dzomwe

Hala halele hala hadisi, pvwakaya mndru yadfohambwa Dzomwe, ohao Mitsamihuli mdjini

Owakati wahe nkodfo ya Mbudfe, Dzomwe haka uwana enkodfo ya Washili

Wandru ngwandzawo wa ûdjuliyane eNgazidja, wafanye suluhu harumwe midji

Bandfa yapvo wandru wa ûdjiliyana Mitsamihuli mdjini

Pvohari mwe lebundjiliyo Dzomwe hapviri pvala pvwa tsoka mndru mwendza hila hadjusa bwe pvala halireme Dzomwe hampasuwa eshehitswa

Dzomwe hadfaza, hahimidfiya Mngu, koyahamba zinu kazi rendwa, harenge lila bwe hafumu tsongowa nilo halitriya ntsigoni

Ngayi ambishihao uka ishindi ika harumwa maha kume na fukare uhondra ishirini hatso kane tsongowa ila ne le bwe haina pvahanu yendao

Hata usiku mwengoni mwa usiku enkodfo ya Mbudfe idja idjuha pvapvo, owandru ngwandzawo wendfe wafanye suluhu ya Mbudfe

Ola mndru yamrema lila bwe hahisa hahuwa nge mwengoni m'owandru warenge emirongoo homarengweni

Wakau ûdjiliyana Ntsaweni

Bahi Dzomwe hapviri ngwendfo ya ishiliye lebundjiliyo

Hendfe hata Chamle, hariwa horiho :

- U-u ! U-u !
Woyi Dzomwe !
Woyi Dzomwe !

Halafu ola mndru urwe ehorihoh kadja ishiya mndru yamdjibu, yaka yenaye

Ola Dzomwe hamba :

- Ah Ah !! Kayiri Dzomwe raha na we
Horiho kayi riwa ni mndru mdzima
« U-u » za uambana !
Kudjaparo ishiya « U-u » ya mndru mdzima

Kayiri Dzomwe raha na we
Yapvo huparwa ni **âyibu**
Tsihu shindi !

Pvahe hamba :

- E huni shindi zabari hindri ?

Dzomwe :

- Hauka hupara wandru wadje wani **deye**, kwadjadja
Yapvo tsihu shindi !

Dzomwe harengé ndziya hende zahe
Hende hata mraya wasaya hahundru owandru ngwa wanao
Ha uzisa zabari hindri owandru wa shindanao
Hambilwa ukaya :

- Pvanu hunu mdjini wandru wendo fanya **dalao** la uwade wahadja
Halafu owadjeni wa tolwa piya, wandru wabaki wa mdji
Sha o udjuha pvotrasi le **dalao** litso djulwa
Wandru kwatsu djuwa li djulwa dje no kapvwadjaka ya mdjeni hunu
mdjini

Pvahe Dzomwe hamba :

- Ah Ah !! Kayiri Dzomwe raha na nyi
Hauka lefiniho lamdrongoo **de** miyomo
Haina wazitriya mbani enge kudja zamba she zadjo djulwa
Yapvo nge lefiniho laroho na mirongoo **de** miyomo
Ah Ah emiyomo yahanyu imshindini
Kayiri Dzomwe raha na nyi

Hende hata hawaswili hula Ntsaweni harumwe lebundjiliyo
Bahi pvoya ndjiya hobundjiliyoni hatso hundra **de** mndru yamrema lila
bwe de urongoo

Dzomwe hari ho mhono harumwe etsongowa, harengé lila **bwe hende**
hata opvohari pvala ola yarongowawo, « E djaa !! » Hamremelo.

Ola hau, owandru wa shemeza :

- Namzingare Dzomwe !
Namzingare Dzomwe !

Bahi pvoya zingarwa ngu tso hamba :

- **'Â'â** !! Sha ndja muuwa
Wilo wilo ! Tsi tso mrema ilo yanirema !!